

## Dodo – 100 affons – in pass – ina tuor

Avon dus onns ha il cantadur da reggae svizzer *Dodo* passentau in meins sil pass digl Alpsu. En in container ha el fatg musica e registrau canzuns e dapi lu para quei pass strusch da schar liber el pli. Igl atun vargau, avon che viagiare anavos tier sias ragischs en l’Africa, eis el era staus sil pass. Lezza ga ha la Fundaziun «Leuchtturm Rheinquelle» beneventau el sco guardian d’honor dalla tuor da signals. Quei di haveva el concertau giud la tuor, ils mulins da reclama havevan denton mulau mal ed ei era strusch glied che tedlava. La dumengia vargada ei Dodo turnaus per concertar. Quella ga cun sustegn da 100 affons dalla scola Sedrun che han giu grond plascher d’astgar cantar treis canzuns cun el. Per fortuna han ils mulins da reclama mulau meglier quella ga e rodund 700 persunas ein serimmadas sil pass. (fmr/sr)

## Signals musicals giu digl Alpsu

Dodo – il guardian da honor 2022/2023 dalla tuor da signals sil pass digl Alpsu – ha concertau la dumengia vargada ensemen cun 100 affons dalla scola Sedrun. Rodund 700 persunas han fatg il viadi cun skis ni cul tren sil pass per guder quei concert unic.

Susi Rothmund/fmr

«Es bitz wie Ferie – es fühlt sich ah wie Ferie – ich bin en Zürimaa in Bärn – es bitz wie Ferie – es fühlt sich ah wie Ferie», plein temprament ha *Dodo* cantau sias canzuns sco «Zürimaa» «hippie-bus» ed autras. Enzatgei sco vacanzas ha il cantadur e performer daveras gia passentau sil pass. Numnadamein igl october 2020 cu el ha viviu e luvrau sigl Alpsu en siu container da musica. Leu ha il cantadur da reggae svizzer seschau inspirar dalla natira e ha cumponiu melodias, scret texts ed oravontut registrau canzuns per siu niev album «Pass».

## Il chor d’affons sustegn DODO

Sil pass digl Alpsu ha la musica uniu la dumengia in pievelun. Ina gronda part eran Tuatschins mo era dalla vart digl Uri era in grond publicum vegnius sil pass per tedlar il concert e tenor ils dialects e lungatgs ch’ei stai d’udir ei la glied vegnida da tuttas parts dalla Svizra ed enzacons perfin digl exteriur. La Fundaziun «Leuchtturm Rheinquelle» ha, cun sustegn dalla vischnaunca Tujetsch clamau e la musica ha ina ga dapli uniu la glied. Sco la menadra dalla scola Sedrun, *Sabrina Suppiger-Hendry* ha declarau sin damonda dalla FMR, ei quei concert staus in project unic pils scolars. Ei erien immens motivai e hagian propi giu tschaffen da trenar cullas scolastas da musica e naturalmein da sepresentar. Cun slontsch e plascher ha il grond chor d’affons susteniu Dodo tier las empremas treis canzuns ed era il publicum ha buca schau per pauc da cantar e saltar el tact. Ils affons havevan gia giu la quida da cantar cun Dodo avon enzacontas jamnas. Lu haveva quel visitau els aposta per quei intent en scola a Sedrun. La dumengia suentermiezdi han ils affons pigns e gronds fatg ina bellezza pareta. Cun lur shirts cotschens silla tribuna da neiv avon la culissa da cuolms ennevai han ei tarmess signals musicals viado el mund. Els ein vegni filmai e fotografai senza fin e malgrad ch’ei ha perfin sbischau in tec er’ei propi «in tec sco vacanzas».

# Ina tuor cun bia potenzial

La tuor da signals cotschna sil pass digl Alpsu sin 2046 m s.m. croda en egl gia dapi diesch onns.

Ella vala sco simbol da colligiaziun per la glied che viva spel Rein – dalla Tgina dil Rein entochen tier la mar.

La FMR ha vuliu saver da treis personas tgei ch'ellas manegian dil concert da *Dodo* e tgei potenzial che la tuor da signals ha.

SUSI ROTHMUND/FMR

Dapi il 2016 elegia la Fundaziun «Leuchtturm Rheinquelle» mintg'onn novas ambassaduras ni ambassadurs sco guardians d'honor dalla tuor. En quei uffeci portan els la tuor viado el

mund e fan reclama per la regiun. La tuor da signals sigl Alpsu ei la suletta dallas Alps e l'idea dils iniziants prevedeva era da plazzar in ver bastiment sil pass.

La tuor ei aunc adina persula sil pass e spetga gia daditg sil bastiment. «In di vegn in bas-

timent a vegnir e quei da Rotterdam», san ins leger silla pagina d'internet dalla fundaziun. La FMR ha dumandau enzacontas personas tgei ch'ellas manegian dalla tuor da signals situada sil pass enstagl sper la mar, dil concert da Dodo e digl effect da marketing.

## Daniel e Roc Schmid, Sedrun



**Roc:** «Quei ei stau cool da cantar cun Dodo e tons affons el chor. Dodo ei in simpatic. Jeu enonuschevel sia canzun «hippie-bus», mia canzun preferida che nus havein astgau cantar cun el ei denton 'Annemarie'».

**Daniel:** «Occurrenzas en loghens unics han adina in effect da plivalur per ina regiun. Il concert da Dodo culs affons ei ina super causa. Quei dat maletgs che van viado el mund e fan aschia pli enonuschenta la tuor da signals e nosa regiun. La glied ei fascinada ch'ei dat sil pass digl Alpsu ina tuor da signals. La Fundaziun «Leuchtturm Rheinquelle» ha contactau mei sco gerau da scola da Tujetsch e la vischnaunca ha purschii maun cun realisar la tribuna da concert da neiv e cun ina contribuziun finanziaria. Il potenzial dalla tuor da signals cun sia historia stuess vegnir nezegiaus aunc pli fetg igl avegnir.»

## Pascal Schär, Ursera



«La tuor da signals va probablamein buc aprau culla cuntrada alpina. Da miu avis eis ei denton fetg bien ch'ella ei cheu sil pass digl Alpsu. La tuor da signals ei identificaziun e ha valur da reconuschientscha. Pil marketing (Pasal Schär ei meinafatschenta dil marketing dad Andermatt Sedrun Mustér) ei quei da muntada centrala. Entras il concert da Dodo marscha enzatgei sil pass e la glied ei serimnada cheu, igl ei in'impurtonta caschun da sentupar. En general ein occurrenzas adattadas per rapportar d'ina regiun e far quella enonuschenta. Tiel concert da Dodo culs affons succeda quei en connex culla tuor da signals.»

## Ursina Vinzens, Sedrun



«Quei ei in bellezza event, nossas duas buobas han giu plascherun da cantar las canzuns da Dodo. Ellas han era cantau dabia a casa ed ein selegradas zun fetg sil concert. La tuor da signals ei daventada in element impurtont sil pass. Ella vegn fotografada savens e survescha aschia sco mied da reclama per l'entira regiun. Il pass cun la tuor ha fetg grond potenzial. Da miu avis astgassen ins duvra quei potenzial dapli per far reclama per nosa biala regiun. Vesend conta glied ch'il concert ha attratg, pudess ei vertir dapli da quellas occurrenzas. Per quella da Dodo e dils affons da Tujetsch ei vegniu fatg bia reclama e quei stuess naturalmein era vegnir fatg per autras occurrenzas attractivas.»